

Seni Preseten Dieter F. Uchtdorf
Oruan Chon Aninis non ewe Aewin Presetensi



Orokofanni non Poun Kewe mi Pwetete

U sun chok pwan ekkoch, fan chommong ua mwar ren ningochun angangen chungu me tikitikin kon. Ew fansoun nupwen ua uta me mwen echo amwararen nios mi peinit, chungu en ewe re Denmark itan Frans Schwarz a iteni *Ewe Riaffou Chapur non ewe Atake*.¹

Ei nios mi fakkun ningoch a tupuni ewe Chon Amanau a fotopukutiw non ewe Ataken Gethsemene. Nupwen A iotek, emon chon nang a ukkuta unukunI, a orokofanni I non poun kewe mi pwetete, a awora kinamwe, aninis, me pochokun.

Nupwen ua ekipwichi ei nios, foun ngasangasei me tupuwei a uren memmefin tong me kinisou chapur use tongeni awewe. Ua tongeni mefi, ekkis chok, ita epwe ifa usun ai upwe nom nupwen ewe Chon Amanau a poputa An angang mi napanap me ren an angei won I ekkewe tipisin chon fonufan. Ua mwareiti ewe tong ese much me chenin ewe Sam fan itan Noun kewe semirit. Ua mwar ren ennetin kinisou chapur fan itan met ewe Nau ese tipis a fori fan itan aramas meinisin me pwan fan itei.

Ewe Asoren ewe Noun Kot

Iteitan ier non ei fansoun sia apwapwaiti me ekiiki usun an Jises Kraist we asor fan itan aramas meinsin.

Met ewe Chon Amanau a fori seni Gethsemene ngeni Golgotha fan itach mi nap seni aitufichin weweiti. A angei won I choun tipisich kewe me a monatiw ew niwinin ese much fan itan an Adam we tipis me nepoputan me pwan

meinisin ekkewe tipis me mwanin ekkewe fitu billion me billion ngun mi fen manau. Ei asor ese much mi pin a efisata I mo Kot, ewe mi napanap, epwe chechek pokiten itan metek, me surutiw chaan seni ekkis meinisin, me a riaffou non pekin inis me non pekin ngun (D&C 19:18).

A riaffou fan itei.

A riaffou fan itom.

Nguni a ureno ren kinisou chapur nupwen ua ekiiki usun ennetin wewen ei asor. Ua kan mefi ai tipetekison non ai sinei pwe ekkewe aramas meinisin mi etiwa ei niffang me awena netiper ngeni I ra tongeni angei omusomus me repwe nimoch seni tipisich kewe, ese nifinifin ifa ngawan are ifa watten choun oser.

Sia tongeni winiti nimenimoch me unus sefan. Sia tongeni ngaseno me ren an ach Chon Amanau mi achengicheng we asor ese much.

Ion Epwe Akinamwekich?

Ika mo ese wor emon neich epwe weri ukukun annonun met ach Samon a riaffou, emon me emon kich sipwe weri fansoun mi kiroch me kipwin—ekkeke fansoun nupwen ach riaffou me netipechou a nikinikinin nap seni met a tufich rech. Epwe wor fansoun nupwen choun me mengiringirin ach kewe tipis epwe chounikichitiw .

Ina minne, ika sipwe ekieta netipach ngeni ewe Samon non ekkana fansoun, ennet Epwe sinei me weweiti. I minne a riaffou fan itach non ewe atake me won ewe

irapenges esap nikitich non riafou iei. Epwe apochokunakich, pesei ngeni kich, me efeiochu kich. Epwe orokofannikich non Poun kewe mi pwetete.

I epwe nap seni emonchon nang ngeni kich.

Epwe awora ngenikich kinamwe, chikar, apinukunuk, me omusomusen tipis.

Pun I ach Chon Amanaw.

Chon Angasakichina.

Ach Chon Amanau mi uren chen me ach Kot mi efeioch.

ESINESIN

1. Ewe pris a afanafan non an Frans Schwarz mi ma a apasa pwe “an angangen chungu mi feioch seni nang me a och nap seni ekkoch afanafan” (Emmie Buchanan-Whitlock, “History of Artists’ Lives Gives Greater Context for Exhibit,” *Deseret News*, Sept. 29, 2013, deseretnews.com).

AFANAFAN SENI EI PORAUS

Me mwen kopwe osukun, kopwe kutta emwen seni ewe Ngun mi Fel pwe epwe anisuk ne weweiti met epwe namwot ngeni ekkewe ir kopwe osukuner. Nupwen ka nounou usun ekkoch kinikin an Preseten Uchtdorf poraus, kopwe apasa omw kapasen pwarata usun ewe Chon Amanau me An asoren angasakicheno. Kopwe ekieki ne eisini ekkewe ir kopwe afanafan ngeni usun met An we Achasefan a wewen ngenir me ifa usun ra mefi kinamwe seni ewe Samon non ar “fansoun mi kiroch me kipwin.”

SERAFO

Win me ren Jises Kraist

Itan ese akafat

Afen wor ai osukosuken mongommong. Ai mongommong fan chommong a efisata mengirigir, netipechou, me nichipung. Ua fakkun mefi apwagapwang nupwen ua achocho ne pworacho ngeni ai osukosuk.

Non fansoun nangatam ua nikitano ennetin nonngonong pwe an ewe Chon Amanau we Achasefan a amanauakich me a pwan angasakicheno me animenimochukich, me ei a pwan fich ngeni ai osukosuken mongommong.

Ua finata pwe upwe fangeta manaei ngeni ai Chon Amanau. Ua iotek. Ua ennetin pwarano ai apwanga-pwang me namwotan ai upwe angei chen, iwe ua tingorei Semach won Nang epwe efeiochuei ren An aninis non ekkanran eppwe wareto. Ena pwinin ua mefi an Semach won Nang tong ennet pwe A ennetin mochen anisi Noun we at me a wor ai manamanan ne apwonueta Netipan.

Seni ena pwinin, mongo ese chiwen or pochokunan woi. Ua sinei Jises Kraist i ewe popun ai pworacho ngeni ei sosot. Usun chok Paul, ua kaeo pwe “Mi wor rei ai pochokun pwe upwe fori mettoch meinisin ren ewe manamanan Kraist a fen ngeniei” (Philippians 4:13). Me ua achocho pwe usap monuki pwan eu neseni Paul: “Kinisou ngeni Kot pun a ngenikich ewe tufichin pworacho me ren ach Samon Jises Kraist” (1 Corinth 15:57).

SEMIRIT

Ewe Chon Amanau Epwe Awora Kinamwe Ngonuk

Kopwe tingorei emonchon famini are emon chiechiom usun ew fansoun nupwen a mefi kinamwe me ren ewe Chon Amanau. Kopwe ekieki usun eu fansoun nupwen ewe Chon Amanau a awora kinamwe ngonuk. Ka tongeni chungani echo niosun ewe fansoun me kopwe pacheta arap ngeni om we pet epwe achema ngonuk pwe Jises Kraist epwe awora kinamwe ngonuk iteitan fansoun meinisin.



Ekkewe Napanapan Manauan Jises Kraist: Songomang me Engino

Anneaochu me ikiotek usun ekkei mettoch me kutta met kopwe tongeni nounou . Ifa usun om weweiti usun manauan me angangen ewe Chon Amanau epwe tongeni anapano om nuku non I me efeiochu ekkewe aramas ka kan tumunu non om angangen an fefin chon amwa? Ren fatafatochun poraus, kopwe nengeni reliefsociety.lds.org.

Nuku, Famini, Aninis

Lei ew kinikinin fitucho Porausen Fefin Chon Amwa usun ekkewe napanapan manauan ewe Chon Amanau.

Engino mi ew napanapan manau mi mosonoson, nge usun Presenten Dieter F. Uchtdorf, Oruan Chon Aninis non ewe Aewin Presetensi, a apasa, “Engino ese wewen ngeni fangeno non mosonoson, me ese wewen pwe sise angang pokiten ach niuokus. Engino a wewen witiwit me nikitu. A wewen pwe sia nikitu non och mettoch . . . ika mo ekkewe mochenin netipach a mangeno. Engino esap chok nikitu ; ngo nikitu non ennetin netipach!”

Non manauach me mwen ei fonufan, Semach won Nang a amonata ew kokkot fan itach—Noun kewe semirit non pekin ngun—me sia pupuchoren pwapwa fan itan ewe tufichin feitiw fonufan (nengeni Job 38:7). Nupwen sia finata pwe sipwe awena netipach me fiti Netipan fansoun ach manau won fonufan, Epwe atufichikich pwe sipwe winiti An pisekin aninis non Poun kewe pwe chommong aramas repwe weri ewe manau ese much (Alma 17:11).

Preseten Uchtdorf a sopweno, “Engino a wewen pwe sia etiwa met sise tongeni siwini me sipwe kunu

ngeni ren pwara, ning, me nuku. A wewen pwe sipwe ‘mwasang ngeni mettoch meinisin minne ewe Samon a mochen amwarata woch, usun chok emon semirit a aneasosichi saman’ [Mosaia 3:19]. Wesewesen, engino a wewen pwe sipwe ‘nuku-char, tipepos ne aneasosichi ekewe annukun ewe Samon [1 Nifai 2:10] iteitan awa iteitan ran, ika mo nupwen mi weires ach sipwe fori.”¹

Pwan ekkoch Wokisin

Konfel 40:1; Galatia 5:22–23; 2 Peter 1:6; Alma 17:11

Seni ekkewe Pukfel

Ekkewe pukfel ra erenikich pwe non manauach won fonufan, “sipwe engino non osukosuk, pun epwe wor chommong rech.” Kot a ngenikich ei pwon mi awora kinamwe, Engino ngeni, pun, nengeni, Ngang ua nonnom reom, tori nesoponon om kewe ran (D&C 24:8).

Ewe tutunap a nom non ewe Paipel mi nom ew awewen engino me nuku.

“Iwe a wor emon fefin mi riaffou ren an osukosuken cha ukukun engon me ru ier . . . a attapa nepwunun ufan [Kraist]: iwe non chok

ewe fansoun ewe cha a kou seni.

“Iwe Jises a eis, . . . Emon a fen attapa ei: pun ua mefi pwe manaman a tou seniei.

“Iwe ewe fefin a sinei pwe a pwa, iwe a chechek o a chape-tiw mwen Jises, iwe mwen meser meinisin neminewe a ereni Jises pwata a attapa I o ifa usun an muttir chikareta.

“Iwe Jises a apasa ngeni, Nei foupun, om nuku a echikarok: kopwe feino non kinamwe” (Luke 8:43–48).

Iwe usun chok i, sia tongeni kuna feioch me kinamwe, me chikar, nupwen sia eitaupouch ngeni Jises Kraist—minne an we Achasefan a tongeni echikarakicheta.

ESINESIN

1. Dieter F. Uchtdorf, “Continue in Patience,” *Liahona*, May 2010, 57, 59.

Ekieki Usun Ekkei

Seni ewe poraus non Luke 8, ifa usun an ei fefin ierin engino me an nuku non Jises Kraist a weri niwinoch?